

SA NATZIONE ITALIANA ESISTIT! IN INTRO DE UN'ISTADU PLURINATZIONALE

de Diegu Corràine.

A 150 annos dae sa nàschida de s'istadu "italianu", semus in un'època de cunfrontu e de cuntierras, cun sas pregontas sòlitas de "chie semus, dae benimus, it'est s'istadu italianu, it'est sa nazione italiana?".

A dolu mannu, in Sardigna, no nde semus faeddende meda de custu tema e de totu su chi rapresentat custa data, nois de su movimentu natzionale sardu. E finas ca podet servire a determinare una istrategia de liberatzione prus crara.

E, imbetzes, diat tocàre a lu fàghere custu cunfrontu, ca sas ideas nostras non mi parent semper craras o unitàrias.

Pro nde leare una de custas ideas, b'at chie, pro afirmare sos deretos e s'esistèntzia de sa nazione sarda, negat s'esistèntzia de sa nazione italiana. A nàrrere sa veridade, no est neghende sos deretos de sos àteros chi afirmamus sos nostros! Tando, devimus declarare, sena timere de nos faddire, chi sa nazione italiana esistit ma non corrispondet a s'istadu italianu. Bi diat mancare àteru! Su chi devimus nàrrere, s'in casu, est chi s'istadu italianu no est "mononatzionale" (in ue corrispondet nazione=istadu), ma est un'istadu nàschidu dae sa voluntade de una nazione majoritària, sa nazione italiana de si dare sos poderes de s'istadu, inglobende àteras nazione, cun s'idea de las assimilare: sa nazione sarda, sa friulana, etc. Su Risorgimentu est istadu unu movimentu legìtimu de sa nazione italiana, chi, però, at negadu su "risorgimentu" de sas àteras nazione inglobadas a fortza.

Duncas sa nazione sarda est una de sas nazione de s'istadu italianu, chi est, duncas, chi agradet o nono, un'istadu plurinatzionale. Una plurinatzionalidade chi, in parte, in manera ogetiva, sa Republica italiana at dèvidu ammìntere in su 1999, cun sa lege 482 chi reconoschet àteras 12 comunidades natzionales, in sinu suo, chi faeddant àteras 12 limbas.

E tando sa nazione italiana de ite est cumposta? Est craru, dae totu su pòpulu de s'istadu, francu sas 12 comunidades natzionales numenadas in sa lege 482/99.

E tando totu sas ipòtesis polìticas de nazione vèneta, piemontesa, etc. non tenent perunu sentidu, ca sunt parte de sa nazione italiana, un'articulazione regionale, comente in Sardigna lu podet èssere s'Ogiastra, sa Baronia, su Montiferru, su Barigadu, Sos Campidanos, sa Costera, etc.

Non podimus negare s'esistèntzia de sa nazione italiana finas ca, si nono, chie est chi nos at custrintu a intrare in un istadu prus mannu de su chi li tocaiàt, si non sa nazione italiana? Su paradossu est chi, si no esistit sa nazione italiana, a sa pregonta "chie càtzigat e negat sa nazione sarda?" diamus dèvere rispòndere "nemos!", comente Ulisse a Polifemu.

Est craru finas chi sa plurinatzionalidade sua no est ammìntida dae s'istadu italianu, nen dae sos polìticos nen dae sos intelletuales. Comente est craru chi non b'at perunu cuadru istituzionale o giurìdicu (francu sa 482/99 in contu de limba) capatzu de assicurare a sas nazione chi sunt in intro de sa Repùblica italiana su deretu a s'autodeterminatzione. Ma custa de sa soberania e de s'autodeterminatzione est totu un'àtera idea chi cheret afortida in Sardigna, pro la pòdere impònnere a s'istadu italianu, in cale si siat forma!

Ma nazione italiana esistit, duncas, e nois Sardos no nde semus una parte!

Dae: <http://limbasnazione.tempusnostru.it> - 2010.

Ripubblicato il 01-01-2011 su www.sanazione.eu